

四庫全書

集部

欽定四庫全書

集部

詩話總龜卷

九至
十二

詳校官侍郎臣劉躍雲

主事銜臣徐以坤覆勘

總校官編修臣倉聖脉

校對官中書臣李斯咏

謄錄監生臣薛炳文

欽定四庫全書

詩話總龜卷九

宋 阮閱 撰

評論門五

東坡作蝸牛詩云中弱不勝觸外堅聊自郭升高不知
疲竟作黏壁枯後改云腥涎不滿殼聊足以自濡升
高不知迴竟作黏壁枯余亦以爲改者勝直方詩話

山谷惠余詩兩篇一云多病廢詩仍止酒一云醉餘睡
起怯春寒觀者以爲疵余曰說詩者不以文害辭豈

非謂此耶

東坡愛常蘇州詩云誰知風雨夜獨此對牀眠向在鄭
西別子由云寒燈相對記疇昔夜雨何時聽蕭瑟又
有初秋寄子由云買田秋已議築室春當成雪堂風
雨夜已作對牀聲又子由與坡相從彭城賦詩云道
遙堂後千尋木長送中宵風雨聲悞喜對牀尋舊約
不知飄泊在彭城子由使北在神水館賦詩云夜雨
從來相對眠茲行萬里隔胡天此其兄弟所賦坡在

御史獄有云他年夜雨獨傷神在東府有云對牀定
悠悠夜雨今蕭瑟其回轉對有云對牀貪聽連宵雨
又云對牀欲作連夜雨又云對牀老兄弟夜雨鳴竹
屋可謂無日忘之

詩云讀書頭欲白相對眼終青身更萬事已頭白相對
百年終眼青看鏡白頭知我老平生青眼爲君明故
人相見尚青眼新貴即今多白頭江山萬里盡頭白
骨肉十年終眼青白頭逢國士青眼酒尊開此坡谷

所爲用青眼對白頭者非一而工拙亦各有差老杜亦云別來頭併白相見眼終青

山谷有詩云小立佇幽香農家能有幾韻聯與荆公詩頗相同當是暗合

方時敏言荆公言鷗鳥不驚之類如何作語則好故山谷有云一鷗同一波

謝朓嘗語沈約曰好詩圓美流轉如彈丸故東坡答王鞏云新詩如彈丸及送歐陽弼云中有清員的銅丸

飛拓彈蓋謂詩貴圓熟也余以謂圓熟多失之平易
老硬多失之乾枯不失於二者之間可與古之作者
並驅

東坡爲溫公作獨樂園詩只從頭四句便已都說盡云
青山在屋上流水在屋下中有五畝園花竹秀而野
此便可以圖畫

東坡嘗謂余書荊公詩云徑暖草如積山晴花更繁縱
橫一川水高下數家村倦憩雞鳴午荒尋犬吠昏歸

來向人說恐是武陵源坡云武陵源不甚好又云也
是此韻中別無韻也

山谷每與余言謝師厚七言絕類老杜但少人知之耳
如倒着衣裳迎戶外盡呼兒女拜燈前編入杜集無
愧

趙德甫云東坡爲程鈞作歸真亭詩云會看千字誄木
杪見龜趺是碑坐不應見木杪

秦少章云世上事絕有理會不得者余前日見孫莘老

大笑東坡謝御賜書詩云有甚道理後面更直說至
陝西奏捷

東坡跋米元章所收書云畫地爲餅未必似要令痴兒
出饒水又云錦囊玉軸來無趾山谷和之云百家傳
本畧相似如月行天見諸水又云拙者竊鉤輒斬趾
皆謂元章患淨病及好奪取人話

東坡平生最慕樂天之爲人故有詩云我甚似樂天但
無素與蠻又云我似樂天君記取筆顛賞遍洛陽春

又云他時要指集賢人知是香山老居士又云定似
香山老居士又云淵明形神似我樂天心相似我東
坡在杭又與樂天所留歲月略相似

東坡送李公擇云有如長庚星到曉爛不收贈道潛云
故人各在天一角相望落落如晨星任師中挽辭云
相看半作晨星沒可憐太白與殘月而黃門送退翁
守懷安亦云我懷同門友勢如曉天星
友或作客學者尤
多用此

晁以道言近見東坡說凡人作文字須是筆頭上挽得
數萬斤起可以言文字已余謂歐公豈不云興來筆
力千鈞重

謝元暉最以澄江淨如練得名故李白云解道澄江淨
如練令人却憶謝玄暉山谷詩云憑誰說與謝玄暉
莫道澄江淨如練則其人之優劣於此亦可以見

撫言載白樂天在江東進士多奔往時張祐負時名既
而徐凝至二子相矛盾祐稱其佳句云樹影中流見

鐘聲兩岸聞凝以爲柰無野人千古長如白練飛一條界破青山色枯愕然不對於是一座盡傾其後東坡云世傳徐凝瀑布詩至爲塵陋又僞作樂天詩稱美此句有賽不得之語樂天雖涉淺易豈至是哉乃作一絕云帝遣銀河一派垂古來惟有謫仙詞飛流濺沫知多少不與徐凝洗惡詩余以爲比之相去何啻九牛一毛也

韓存中云東坡嘗云人言盧杞是姦邪我見鄭公但嫵

媚好作一對請諸人將去作一篇詩

崔中云山谷稱晏叔原舞低楊柳樓心月歌盡桃花扇
底風定非窮兒家語

韓存中云東坡作漁蓑句好真堪畫柳絮才高不道蘊
只不道蘊與真堪畫自合是一對

陳無已云山谷最愛舒王扶輿度陽羨窈窕一川花謂
包含數箇意

韓存中云家中有山谷寫詩一紙乃是公有胸中五色

筆平生補袞用功深此詩本用小杜詩中五色線而却書云五色筆此真所謂筆悞

賀方回初作青玉案詞遂知名其間有云彩筆新題斷腸句後山谷有詩云少游醉卧古藤下誰作詩歌送一杯解道江南斷腸句只今惟有賀方回蓋載青玉案事

東坡作藏春塢有云年拋造化甄陶外春在先生杖屨中而秦少游作俞允袞詞乃云風生使者旌旄上春

在將軍俎豆中余以爲依倣太甚

陶潛避俗翁未必能達道觀其著詩集頗亦根枯槁達
生豈是足默識益不早生子賢與愚何其繫懷抱山
谷云杜子美困窮於三蜀益謂不知者詬病以爲拙
於生事又往往譏議宗文宗武失學故聊托之淵明
以解嘲耳其詩名曰遣興可解也俗人便爲譏病淵
明所謂痴人前不得說夢也余以爲安得山谷將工
部詩篇篇如此訓釋以成一集乎

日月老賓客送山谷詩也日月馬上過文潛詩也其工拙有能辨之者老杜云厨人語夜闌東坡云圖書跌宕悲年老燈火青熒語夜深山谷云兒女燈前語夜深余爲當以先後分勝負

山谷與余詩云百葉湘桃苦惱人又云欲作短歌憑阿素丁寧誇與落花風其後改苦惱作觸撥改歌作章改丁寧作緩歌余以爲詩不厭多改

東坡作百步洪詩云有如兔走鷹隼落駿馬下注千丈

坡當在黃時有人云千丈坡豈注馬處及還朝其人云惟善走馬方能注坡聞者以爲注坡

山谷有茶詩押腸字韻和者已數四而山谷最後有曲几團蒲聽煮湯煎成車聲入羊腸之句東坡云黃九怎得不窮故晁無咎復和云車聲出鼎細九盤如此佳句誰能識

文潛先與李公擇輩來余家作長句後再同東坡來坡讀其詩歎息云此不是吃烟火食人道底言語蓋其

間有漱井消午醉掃花坐晚涼衆綠結夏帷老紅駐
春妝山谷次韻云張侯筆端勢三秀麗芝房掃花坐
晚吹妙語亦難忘

白樂天有詩云醉貌如霜葉雖紅不是春東坡有詩云
兒童誤喜朱顏在一笑那知是酒紅鄭谷云衰鬢霜
供白愁顏酒借紅老杜云髮少何勞白顏衰肯更紅
無已出此一聯大爲諸公稱賞

宋景文云詩人必自成一家然後傳不朽若體規畫圓

準方作矩終爲人之臣僕故山谷詩云文章最忌隨人後又云自成一家始逼真誠不易之論

東坡送江公著云忽憶釣臺歸洗耳又云亦念人生行樂耳註云二耳義不同故得重用

陳淳字子真南昌人也嘗以詩呈山谷云作詩須要開廣如老杜日月籠中鳥乾坤水上萍之類子真云淳輩那便到此山谷曰無亦只是初見

洪龜父有詩云琅玕巖佛界薜荔上僧垣山谷改云琅

璫鳴佛屋以謂薜荔是一聲須要一聲對琅璫卽一聲也余以爲然

龜父云朋見張文潛言魯直楚詞誠不可及晁無咎言魯直楚詞固不可及而律詩補之終身不敢近也余嘗聞龜父前後詩有一朝厭蝸角萬里騎鵬背一聯最爲妙絕龜父云山谷亦歎賞此句

山谷謂龜父云甥最愛老舅詩中何等篇龜父舉螳穴或夢封侯王蜂房各自開戶牖及黃塵不解浣明月

碧樹爲我生涼秋以爲絕類工部山谷云得之

古詩云公道世間惟白髮貴人頭上不曾饒而元祐初
多用老成故東坡有云此生自斷天休問白髮年來
漸不公陳無已答邢敦夫云今代貴人頭白髮掛冠
高處不宜彈其後秦少游謂李端叔復有白髮偏於
我輩公之句則是白髮有隨時之義

東坡云爲我周旋寧作我一句只是難對時王平甫在
坐應聲云只消道因郎憔悴却羞郎

秦少游嘗和黃法曹憶梅花詩東坡稱之故次其韻有
西湖處士骨應槁只有此詩君壓倒之句此詩初無
妙處不知坡所愛者何語和者數四余獨愛坡兩句
云江頭千樹春欲暗竹外一枝斜更好後必有能辯
之者

陳無已作小放歌行兩篇其一云春風永巷閑娉婷長
使青樓誤得名不惜捲簾通一顧怕君著眼未分明
其二云當年不嫁惜娉婷映白施朱作後生說與旁

人須早計隨宜梳洗莫傾城山谷云無已他日作語
極高古至於此篇則顧影徘徊銜耀太甚

荆公有詩云端能過我論奇字亦復令君見異書東坡
亦云未許郎中得異書且共楊雄說奇字陳無已又
以奇字對異方

東坡題李秀才醉眠亭詩云君且歸休我欲眠人言此
語出天然醉中對客眠何害須信陶潛未苦賢山谷
題無咎卧陶軒亦云欲眠不遣客佳處更難忘意極

相類

秦少游嘗以真字題月團新碾瀾花甕飲罷呼兒課楚
詞風定小軒無落葉青蟲相對吐秋絲於邢敦夫扇
上山谷見之乃於扇背復作小草題黃葉委庭觀九
州小蟲催女獻公裘金錢滿地無人費百斛明珠惹
改秋皆所自作也少游後見之云逼我太甚邢敦夫
云掃地燒香閉閣眠簾紋如水帳如烟客來夢覺知
何處掛起西窗浪接天東坡詩嘗題於余扇山谷初

讀以爲是劉夢得所作也

陳留市中有刀鐻工隨所得爲一日費醉吟於市負其子以行歌江端禮以爲達者爲作傳而要無已賦詩無已詩有閉門十日雨凍作饑鶯聲大爲山谷所愛山谷後亦擬作有云養性霜刀在閱人清鏡空無以復加

潘邠老云陳三所謂學詩如學仙時至骨自換此語爲得之然余見山谷有學詩如學道之句陳三所得豈

苗裔耶 並同前

山谷謂余言吾少年時作漁父詞曰新婦磯頭眉黛愁
小姑堤畔眼波秋魚兒錯認月沉鉤青蒻笠前無限
事綠蓑衣底一時休斜風細雨轉船頭以示坡坡笑
曰山谷境界乃於青蒻笠前而已耶獨謝師直一讀
知吾用意謂人曰此即能於水容山光玉肌花貌無
異見是真解脫遊戲耳

冷齋夜話

舒王詩曰紅梨無葉庇華身黃菊分香委路塵晚歲蒼

官才自保日高青女尚橫陳又云木落岡巒因自獻
水歸洲渚得橫陳山谷謂余曰自獻橫陳見相如賦
荆公不應全用余曰首楞經亦曰於橫陳時味如嚼
蠟

山谷云詩意無窮人之才有限以有限之才追無窮之
意雖少陵淵明不得工也然不易其意而造其語謂
之換骨法規模其意而形容之謂之奪胎法如鄭谷
十月菊曰自緣今日人心別未必秋香一夜衰此意

甚佳而病在氣不長西漢文章雄深雅健其氣長故
也曾子固曰詩當使人一覽語盡而意有餘乃古人
用心處所以舒王菊詩曰千花百卉凋零後始見閒
人把一枝坡則曰萬事到頭都是夢休休明日黃花
蝶也愁李翰林曰鳥飛不盡暮天碧又曰青天盡處
沒孤鴻其病如前所論山谷登達觀臺詩曰瘦藤挂
到風煙上乞與遊人眼界開不知眼界開多少白鳥
去盡青天回凡此之類皆換骨法也顧況詩曰一別

二十年人堪幾回別其詩簡緩而立意精確舒王與
故人詩曰一日君家把酒盃六年波浪與塵埃不知
烏石岡邊路到老相尋得幾回樂天曰臨風杪秋樹
對酒長年身醉貌如霜葉雖紅不是春東坡南中詩
曰兒童悞喜朱顏在一笑那知是醉紅凡此皆奪胎
法唐詩曰長因送人處憶得別家時又曰舊國別多
日故人無少年舒王東坡用其意作古今不經人道
語王詩曰木末北山烟冉冉草根南澗水泠泠綠成

白雪桑重綠割盡黃雲稻正青坡曰桑疇雨過羅紈
膩麥隴風來餅餌香如華嚴經舉果知因譬如蓮花
方其吐花而果具蕊中造語之工至於舒王東坡山
谷盡古今之變舒王曰江月轉空爲白晝嶺雲分暝
與黃昏一水護田將綠遶兩山排闥送青來坡海棠
詩曰只恐夜深花睡去故燒高燭照紅妝又曰我攜
此石歸袖中有東海山谷曰此皆謂之句中眼李格
非嘗曰老杜謂之詩史者具大過人在誠實耳如玉

川子醉歸詩曰昨夜村飲歸健到三四五摩挲青莓
苔莫嗔驚看汝舒王用其意作扇子詩曰玉斧修成
寶月圓月邊仍有女乘鸞青冥風露非人世鬢亂釵
橫特地寒謝公有池塘生春草園林變夏禽謂之神
助古今文士多稱之李元膺曰此句未有過人處古
人意所至則見於情詩句蓋寓也謝公喜惠連夢中
當論情意不當泥句吾弟超然曰陳叔寶絕無肺腸
詩語有驚絕者如午醉醒來晚無人夢自驚夕陽如

有意長傍小窗明王摩詰山中小詩曰荆溪白石出
天寒紅葉稀山路原無雨空翠濕人衣舒王百家衣
體曰相看不忍發慘淡暮潮平欲別更攜手月明洲
渚生此得天趣問曰何以識其天趣曰能知蕭何所
以識韓信則天趣可解余竟不能詰

東坡曰淵明詩初看若散緩熟讀有奇趣如曰日暮巾
柴車路暗光已夕歸人望煙火稚子候簷隙又曰藹
藹遠人村依依墟里煙犬吠深巷中雞鳴桑樹顛才

高意遠造語精到如此如曰一千里色中秋月十萬
軍聲半夜潮蝴蝶夢中家萬里子規枝上月三更深
秋簾幙千家雨落日樓臺一笛風皆寒乞相初如秀
整熟視無神氣以字露故也東坡則曰山中老宿依
然在案上楞嚴已不看細味之無齟齬態問甚的而
字不露得淵明遺意耳對句法人不過以事以意出
處備具謂之妙荊公曰平昔離愁寬帶眼迄今歸思
滿琴心又曰欲寄荒寒無善畫賴傳悲壯有能琴不

若東坡特奇如曰見說騎鯨遊汗漫亦曾捫虱話酸
辛又曰龍驤萬斛不敢過漁舟一葉從掀舞以鯨爲
虱對龍驤爲漁舟對大小氣焰之不等其意若玩世
謂之秀傑之氣終不可沒夫富貴中不得言貧賤事
少壯中不得言衰老康強不得言疾病死亡或犯之
謂之詩識是大不然詩者妙觀逸想豈限繩墨哉王
維作雪中畫芭蕉詩眼見已知其神情意寓於物俗
則譏其不知寒暑荆公方大拜忽書其壁曰霜筠雪

竹鍾山寺投老歸歟寄此生東坡詩曰平生萬事足
所欠惟一死豈可與俗論余作詩曰東坡醉墨浩琳
琅千首空餘萬丈光雪裏芭蕉失寒暑眼中騏驎略
玄黃句法欲老健有英氣當間用方言爲妙奇男子
行人羣中自然有韻脫不可干犯之韻老杜八仙詩
序李太白曰天子呼來不上船船方言也所謂襟紐
是已家家養烏鬼頓頓食黃魚川峽路民多供事烏
蠻鬼以臨江故頓頓食黃魚耳俗人不解便作養畜

字讀遂使沈存中自差以烏鬼爲鸕鷀也

詩云夜闌更秉燭相對如夢寐更互秉燭照之恐是夢也作更字讀則失意甚矣山谷每用之所謂一霎社公雨數番花信風是也江左風流久已零落士大夫人品不高故音韻絕滅東晉韻人勝士無出謝安石之右煙霏空翠間乃攜娉婷登之與夫雪夜訪山陰故人興盡而反下馬據胡牀三弄而去者異矣詩有句含蓄者老杜曰勲業頻看鏡行藏獨倚樓鄭雪更

曰相看臨遠水獨自上孤舟是也有意含蓄者如宮
詞曰銀燭秋光冷畫屏輕羅小扇撲流螢天街夜色
涼如水卧看牽牛織女星又嘲人詩曰恠來妝閣閉
朝下不相迎總向春園裏花間笑語聲是也有句意
俱含蓄者如九日詩曰明年此會知誰健醉把茱萸
仔細看宮怨曰玉容不及寒鴉色猶帶朝陽日影來
是也

並同前

田承君云王居卿在揚州同孫巨源蘓子瞻適相會居

卿置酒曰疎影橫斜水清淺暗香浮動月黃昏此林
和靖梅花詩然而爲詠杏與桃李皆可東坡曰可則
可但恐杏李花不敢承當一座大笑

詩話總龜卷九

欽定四庫全書

詩話總龜卷十

宋 阮閱 撰

雅什門上

王安國平南作詩多使酒樓語宋次道曰楊文公詩有
酒樓江南堤柳拂人頭李白題詩遍酒樓錢昭度亦
有一酒樓長憶錢塘江上望酒樓人散雨千絲今子
詩有幾酒樓次道曰吾詩有二酒樓九江琵琶亭云
夜泊潯陽宿酒樓琵琶亭畔荻花秋雲沉鳥沒事已

往月白風清江自流又送客西陵云若耶溪畔醉秋
風獵獵船旗照水紅後夜錢塘酒樓上夢魂應遶浙

江東

青箱
雜記

西方琥東州人鄭毅夫榜登第期集處告毅夫曰榜中
琥最少年乞作探花郎毅夫云已差二人琥曰此無
定員添一員何損公吏曰前日琥第三甲合出鋪地
錢二十緡若作職事則不出錢琥曰願出錢毅夫從
其請琥已受符不出緡毅夫切責之而倍其罰琥白

毅夫曰晚進未嘗工詩願狀元先爲之以爲楷式毅夫曰綠袍不怕露痕濕直入鬧花深處來他日復見之毅夫復云朝來已與碧桃約留住春風不放歸聞

者歎服

翰府名談

成都慈光寺尼乘舟夜行一篇亦佳云水色連天色風聲益浪聲旅人歸思苦漁父夢魂驚舉棹雲先到移舟月逐行旅吟詩句罷猶見遠山橫

京師曹氏家藏阮步兵詩一卷唐人所書與世所傳多異有數十首集中所無其一篇云放心懷寸陰義和將欲冥揮袂撫長劒仰觀浮雲行雲間有立鵠抗首揚哀聲一飛冲青天彊世不再鳴安與鷄鷄徒翩翩戲中庭又云嘉木不成蹊東園損桃李秋風吹飛雀零落從此始孫巨源見之云此詩工夫不少遂刻之於石

吳人方子通作古柏詩云四邊喬木盡兒孫曾見吳宮

幾度春若使當時成大廈也應隨例作埃塵又作灩
澦堆詩湍流怪石碍通津一一操舟若有神自是世
間無妙手古來何事不由人舒王見而奇之
雲齋廣錄
舒王得請金陵寓定力院題一絕於壁間云溪北溪南
水暗通隔溪遙見夕陽春思量諸葛成何事只合終
身作卧龍

天聖中禮部郎中孫冕刻三英詩劉元載妻詹茂光妻
趙晟之母早梅寄遠惜別三詩劉妻袁子無立詹妻

留夫侍母病趙母懼子遠遊孫公愛其才以取之早
梅詩云南枝向暖北枝寒一種春風有兩般憑仗高
樓莫吹笛大家留取倚闌干寄遠詩云錦江江上探
春回消盡寒冰落盡梅爭得兒夫似春色一年一度
一歸來惜別詩云煖有花枝冷有冰惟人沒後却無
憑預愁離別苦相對挑盡漁陽一夜燈

金華瀛洲集
又撫遺記梅

花詩是女仙題

蜀州江梅閣

王元字文元桂林人苦吟風月終於貧病妻黃氏共持

雅操每遇得句中夜必先起燃燭供具紙筆元甚重
之有聽琴詩曰拂琴開素匣何事獨顰眉古調俗不
樂正聲公自知寒泉出澗澁老檜倚風悲復有來聽
者誰堪繼子期好事者畫爲圖

郡閣
雅談

僧虛中宜春人游瀟湘山與齊己顧栖蟾爲詩友住湘
江西宗成寺潭州馬氏子希振侍中好事每出即延
納於書閣中好燒柴火烟皆彩翠去後復節題馬侍
中池亭云嘉魚在深處幽鳥立多時集首寄華山司

空圖侍郎云門徑放莎垂往來投刺希有時開御札
特地掛朝衣岳色僧傳去天香鶴帶歸他時周召作
無復更哀微司空侍郎有詩言懷云十年華岳峰前

住只得虛中一首詩

同前

唐大清宮使翰林學士錢起多作佳篇人收起詩不過
百首有錢蒙仲得江行無題一百絕皆人家藏本所
無有云霽雲疎有葉雨浪細無聲穩放扁州去江天
自有程又憔悴異靈均非讒作逐臣如逢漁父問未

是獨醒人又烟渚後烟渚畫屏連畫屏引惹天末去
數點暮山青又隄壞漏江水地拗成野塘晚荷從不

折留取作秋香

詩史

權常侍題山寺曰萬葉風聲利一山秋氣寒曉霜浮碧
瓦薄日度朱欄又得即高歌失即休多悲多恨謾悠
悠今朝有酒今朝醉明日愁來明日愁

王駕大順中擢第爲禮部員外郎棄官號守素先生與
司空圖鄭谷爲詩友所爲詩少傳者晴景一篇最佳

云雨前不見花間葉雨後全無葉底花蜂蝶飛來過
牆去應疑春色在人家

柳彥塗塞上云鳴髀直上幾千尺天靜無風聲更乾碧
眼胡兒三百騎盡提金勒向雲看都下好事者畫爲
圖

歐陽文忠公酷愛鮑溶詩山中寒思一篇最佳云山深
多悲風敗葉與林齊門逕非世路何人念窮棲哀風
破山起夕雪悞鳴雞巢鳥侵旦出饑猿無聲啼辰興

動煙火開雲伐冰溪老木寒更瘦陰雲晴亦低我負
自力永顏色常低迷時想靈臺下遊子正悽悽文忠
晚得恨見之遲今人少愛浴詩者

閩人謝伯初字景山天聖景祐之間以詩知名余謫夷
陵景山爲許州法曹以長韻見寄頗多佳句有云長
官山色江波綠學士文華蜀錦張余答曰參軍春思
亂如雲白髮題詩愁送春蓋景山有多情未老頭先
白野思到春亂如雲之句故余比戲之景山詩頗多

如自種黃花添野景旋移高竹聽秋聲園林換葉梅
初熟池館無人燕學飛皆無愧唐賢仕宦不偶終以
困窮而卒其詩因錄於此云江流無險似瞿塘滿峽
猿聲斷旅腸萬里可堪人謫宦經年應合鬢成霜長
官山色江波綠學士文華蜀錦張異域化爲儒雅俗
遠民爭識校讎郎才如夢得多爲累情似安仁久悼
亡下國難留金馬客新詩傳與竹枝娘典辭縣待脩
青史諫草當留集阜囊莫爲明時輕譴謫便將纓足

濯滄浪

歐陽公詩話

鄭相縈牧廬州日以詩酒爲娛題郡齋曰九衢塵裏一書生多幸逢時擁旆旌醉裏眼開金使字紫旂風動耀江明後代者薛沆郎中到郡題藏舟浦花一聯云也知別有風光主蓓蕾枝枝似去年又別後寄席中三蘭

三人名中並曰蘭

淮淝兩水不相通隔岸臨流望向東

千顆淚珠無寄處一時彈與渡前風鄭多佳句如凍

瓶粘柱礎宿火陷爐灰人皆稱之

南郡新書

廖凝字熙績善吟諷有學行隱居南岳三年江南受僞
官爲彭澤令遷連州刺史與昇平李建勲爲詩友相
善有集蓋見行於世咏中秋月與聞蟬爲絕唱中秋
月云九十日秋色今宵已半分孤光吞列宿四面絕
微雲衆木排疎影寒流疊細紋遙遙望丹桂心緒正
紛紛聞蟬云一聲初應候萬木已西風偏感異鄉客
先於離塞鴻日斜金谷靜雨過石城空此處不堪聽
蕭條千古同凝居南岳常鼎有詩贈曰君與白雲鄰

生涯久忍貧姓名高雅道寰海許何人岳氣秋來早
亭寒果落新幾回吟石畔孤鶴自相親初宰彭澤有
句云風清竹閣留僧宿雨過莎庭放吏衙解印有句
云五斗徒勞謾折腰三年兩鬢爲誰焦今朝官滿重
歸去還挈來時舊酒瓢江左學詩者競造其門

劉禹昭字休明婺州人少師林寬爲詩刻苦不憚風雪
詩云句向夜深得心從天外歸言不虛耳懷蕭山隱
者云先生入太華杳杳絕良音秋夢有時見孤雲無

處尋神清峰頂立衣冷瀑邊吟應笑千名者六街塵
土深嘗與人論詩曰五言如四十箇賢人亂著一字
屠沽輩也覓句者若掘得玉匣有底有益但精求必
得其實在湖南累爲宰後卒於桂府幕有詩行於世

邵閣
雅談

廖融字元素隱於衡山與逸人任鵠王正己凌蟾王元
皆一時名士爲詩相善湘守楊徽之代歸闕枉道出
南岳宿融山齋留詩曰清和春尚在歡醉日何長谷

鳥隨柯轉庭花奪酒香初晴巖翠滴向晚樹陰涼別
有堪吟處相留宿草堂融贈天台逸人云移檜託禪
子攜家上赤城拂琴天籟寂歌枕海濤生雪白寒峰
晚鳥歌春谷晴又聞求桂檝載月十洲行又題寺古
檜云何人見植初老對梵王居山鬼暗棲托樵夫難
破除聲高秋漢迴影倒月潭虛盡日無僧遶清風長
有餘夢仙謠云琪木扶疎繫辟邪麻姑夜宴紫皇家
銀河旌節搖波影珠閣笙簫吸月華翠鳳引遊三島

路赤龍齊別五雲車星稀猶倚虹橋立擬就張騫搭
漢槎退宮妓云神仙風格本難儔曾從前皇翠輦遊
紅躑躅繁金殿暖碧芙蓉笑水宮秋寶車鈿剝陰塵
覆錦帳香銷畫燭幽一旦也哀歸故里月明猶夢按
梁州左司諫張觀過衡山留詩曰未向漆園爲傲吏
定應明代作徵君家傳奕世無金玉樂道經年有典
墳帶雨小舟橫別澗隔花幽犬吠深雲到頭終爲蒼
生起休戀耕煙楚水濱融卒刺史何承矩葬之進士

鄭鉉志其墓

劉相公鄴因白令公維持方入翰苑仍賜及第爲同列
所輕因作詩曰曾是江波垂釣人自憐深厭九衢塵
浮生漸老年隨水往事曾聞淚滿巾已覺遠天秋色
動不堪閒夜雨聲頻多慚不是相如筆虛直金鑾接
侍臣待漏院吟曰玉堂簾外燭遲遲明月初時契勛
時閒聽景陽鍾盡處兩鶯飛上萬年枝才調清高終

秉鈞衡

盧懷
行情

薛尚書釗爲河東從事乞假歸寧題候館曰僕帶彫弓
馬似飛老萊衣上着戎衣郵亭不暇吟山水塞外經
年皆未歸後鎮徐州咏柳曰高出軍營遠映橋曾逢
兵火一時燒風流性在終難挫暖日還生萬萬條又
有雅句坐久僕頭出語多僧齒寒

南部
新書

吳門陸暢郎中嘗和人雪詩落句曰天人寧底巧剪水
作花飛又出齋看月云野性平生惟好月新晴半夜
覩嬋娟起來自褰書窗破恰漏清光落枕前後因雲

安出降百僚舉暢爲儻相奉詔作催妝詩云雲安公
主貴出降五侯家天母看調粉日兄憐賜花催鋪百

子帳待障七香車借問妝成未東方欲晚霞

古今詩話

潘閔歸錢塘云久客見華髮孤棹桐廬歸新月無朗照
落日有餘輝漁浦風水急龍山烟火微時聞沙上鴈

一一皆南飛人謂不減劉長卿

同前

韋承貽咸通中策試夜潛紀長句於都堂南壁云裛衣
博帶滿塵埃獨上都堂納卷回蓬巷幾時聞吉語棘

籬何日却重來三條燭盡鍾初動七轉丹成鼎未開
殘月漸低人擾擾不知誰是謫仙才又云白蓮千朶
照廊明一片昇平雅韻聲才唱第三條燭盡南宮風

月畫難成

同前

徐休雅長沙人因馬希範夜宴迎四儀夫人賦詩云雲
路半開千里月洞門斜掩一天春又作宮詞云內人
曉起怯春寒輕揭珠簾看牡丹一把柳絲收不得和
風搭在玉欄杆魯獻家宴堂十首時稱冠絕

郡閣雅談

文宗詔禮部侍郎高錡作貢舉試霓裳羽衣曲詩時宗
子李肱詩最佳詩曰開元太平時萬國賀豐歲梨園
獻小曲玉座流新製鳳管勞參差霞衣覺搖曳宴罷
水殿空輦餘芳草細蓬壺事已久仙樂功無替詎肯
聽餘音聖明知善繼

撫州蔡牧嘗作責四皓詩云秦末家家思逐鹿商山四
皓獨忘機如何鬢髮霜相似更出山來定是非及假
節交邕道經湖口零陵太守鄭史同年也遠以酒樂

相迎坐有瓊枝者守之所愛奪之而去洎中興頌下
僊俛不前久之到邕御制失律伏法湘川樵厝二子
延近終喪而逝論者謂妄責四皓而欲買山於浯溪
之間不徒言哉

方干為人質野每見人設三拜曰禮數有三識之者呼
為方三拜貌寢又免缺有司以故不與科名隱會稽
鏡湖其別業詩云寒山壓鏡心此處是家林梁燕窺
春醉岳猿學夜吟雲連平地起月向白波沉猶自聞

鐘角棲身可在深又云世人如不容吾自縱天慵落
葉憑風掃香杭倩水春花朝連郭霧雪夜隔湖鐘身
外能無事頭宜白此峰寄清越上人云窓接停猿樹
岫飛洗鶴泉送姚員外赴金州云野烟新驛曙殘照
古山秋樹勢連巴沒江聲入楚流鍊句字字無失有
高堅峻拔之目自咸通得名迄文德江之南未有及
者

張蠙清河人登乾寧進士為犀浦令王建開國拜登膳

部員外郎後為金堂令王衍與徐后遊大慈寺見壁間書牆頭細雨垂纖草水面風回聚落花愛之知為蠓句給札令以詩進蠓進二百首衍頗重之其登單于臺詩曰白日地中出黃河天上來尤為世所稱王審知據閩黃滔為其判官幕府應用文及塔廟碑碣半出其手為詩清渾丰潤有貞元長慶風槩如寺寒三伏雨松偃數朝枝又有青山寒帶雨古木夜啼猿又如聞雁云一聲初觸夢半白已侵頭

裴說旅次衡陽詩云欲往幾經年今來意豁然江風長
借客嶽雨不因天戲鷺飛輕雪驚鴻叫亂烟晚秋紅
藕裡十宿寄漁舡嘗以所業十九首為行卷來年秋
賦復行舊卷云前十九首尚無見知何假別行卷哉
李洞唐諸王孫嘗慕賈浪仙為詩鑄銅像其儀事之如
神詩數百篇皆絕唱贈司空侍郎云馬饑食落葉鶴
病曬殘陽又有捲箔青溪月敲松紫閣書送僧云越
講迎騎象蕃齋懺射雕贈高僕射云征南破虜漢功

臣提劍歸來萬里身閒傍凌雲金柱看形容消瘦老
于真送人歸日本云島嶼分諸國星河共一天人但
謂其僻澀而不知貴其奇峭唯吳子華深知之子華
才力浩大八面應敵以百篇示洞洞曰大兄所示百
篇有一聯絕唱新亭曰暖漾魚遺子晴遊鹿引麝子
華不怨所鄙而喜其所許

周賀少從浮屠法名清鑒遇姚合而返初與賈島無可
齊名島哭栢巖禪師曰苔覆石牀新師曾占幾春寫

留行道影焚却坐禪身塔院闕松雪房廊露隙塵自
憐雙淚下不是解空人賀詩曰林逋西風急松枝講
妙餘凍鬚亡夜剃遺偈病時書地燥焚身後堂空著

影初此時頻下淚曾有到吾廬

同前

孟賁于蟠溪懷古云良哉呂尚父深隱始歸周釣石千
年在春風一水流松根盤蘚石花影卧沙鷗誰更懷
韜術追思古渡頭又懷連上舊居云閒思連上景難
齊樹遶仙鄉路遶溪明月夜舟漁父唱春風平野鷗

鵲啼城邊寄信歸雲外花下傾盃到日西更憶海陽

垂釣侶昔年相遇草萋萋

雅言
系述

曹鄴字業之桂林人爲四怨三愁五情詩其怨云庭花
已結子岩花猶弄色誰令生處遠用盡春風力其愁
云別家鬢未生到城鬚似髮朝朝臨水望灞水不入
越其情云空城野雀饑咬咬復飛飛勿恡官倉粟官
倉無空時爲舍人韋慤所知力薦於主司乃中第看
榜日謁主司云一辭桂嶺猿九泣都門月年年孟春

至看花不如雪杏園宴上呈同年云賢路非在天十
年行不至一旦公道開青雲在平地又云故衣未及
換尚有去年淚又云永持共濟心莫起胡越意

劉章子克明江左人事湖南馬氏有蒲鞋詩云吳江浪
浸白蒲春越女初挑一樣新纔自繡窗離玉指便隨
羅襪上香塵石榴裙下從容久玳瑁筵前整頓頻今
日高樓駕瓦上不知拋擲是何人

黃損連山人作公子行云春草綠綿綿驕驂驟暖煙微

風飄樂韻半日醉花邊打鵲拋金盞招人舉玉鞭田
翁與蠶婦平地看神仙又出山吟云來書初出白雲
扃乍躡秋風馬走輕遠近留連分岳色別離嗚咽亂
泉聲休將巢許爭喧雜自共伊皋論太平昨夜細看
雲色裏進賢星座甚分明

並同
前

詩話總龜卷十

欽定四庫全書

詩話總龜卷十一

宋 阮 閱 撰

雅什門下

張瀛碧之子也事廣南劉氏官至曹郎嘗爲歌贈琴棋
僧同列見之曰非其父不生其子詩云我嘗聽師法
一說波上蓮花水中月不垢不淨是色空無法無空
亦無滅我嘗聽師禪一觀浪溢鰲頭蟾魄滿河沙世
界盡空空一寸寒灰冷燈畔我又聽師琴一撫長松

喚住秋山雨絃中雅弄若鏗金指下寒泉流太古我
又聽師棋一着山頂坐沉紅日脚阿誰稱是國手人
羅浮道士賭却鶴輸却藥法懷斟下紅霞丹束手不

敢爭頭角

雅言
系述

翁宏字大舉桂嶺人常寓居韶賀間不仕進能詩宮詞
云又是春殘也如何出翠帷落花人獨立微雨燕雙
飛寓目魂將斷經年夢亦非那堪向秋夕蕭颯暮蟾
輝秋風曲云又是秋殘也無聊意若何客程江外遠

歸思夜深多峴首飛黃葉湘湄走白波仍聞漢都護
今歲合休戈塞上曲云風高弓力大霜重角聲乾海
中山云客帆來異域別島落蟠桃中秋月云寒清萬
國土冷鬪四維根曉月云漏光殘井甃缺影背山椒
送人下峽云萬木殘秋裏孤舟半夜猿南越行云因
尋賣珠客悞入射猿家細雨云何處殘春夜和花落
古宮途中逢故人云孤舟半夜雨上國十年心開寶
中衡山處士廖融南遊宏有詩云病卧瘴雲間莓苔

清竹關孤吟牛渚月老憶洞庭山壯志潛消盡淳風
竟未還今朝忽相遇執手一開顏宏以百篇示融融
謝宏云高竒一百篇見造化工全積思遊滄海冥搜
入洞天神珠迷罔象瑞玉匪雕鑪休歎不得力離騷
千古傳王元懷云獨夜思君切無人知此情滄洲歸
未得華髮別來生孤館木初落高空月正明遠書多
隔歲猶念沒前程皆佳句也

張子明攸縣人居鳳巢山有詩名孤鴈一篇最佳云隻

影翩翩下碧湘旁池駕鷺下銀塘雖逢夜雨迷深浦
終向晴天著舊行憶伴幾回思片月蛻翎多爲繫繁
霜江南塞北俱闕切兩地歸飛似故鄉

路洵美唐相巖之元孫有夜坐詩云簾捲竹軒清四鄰
無語聲漏從吟裏轉月自坐來明草木露華濕衣裳
寒氣生難逢知鑒者空悅此時情競傳於湖南

伍彬邳陽人初事馬氏王師下湖湘授官爲安邑簿秩
滿歸隱題全義分水嶺云前賢功及物禹後杳難儔

不及古今色平分南北流寒衝山影岸清繞荻花洲
盡是朝宗去潺湲早晚休夏日喜雨云稚子出看莎
徑沒漁翁來報竹橋流辭解牧云蹤跡未辭駕鷺客
夢魂先到鷓鴣村泊居隱廖融書其屋曰圓塘綠水
平魚躍紫萼生要路貧無力深村老退耕犢隨原草
遠蛙傍塹籬鳴撥棹茶川去初逢穀雨晴路振贈詩
云考終秋鬢白歸隱舊峰前庭樹鳥頻啄山房人尚
眠寒巖落桂子野水過茶煙已絕勞生念虔心向竺

乾

王元字文元桂林人有登祝融峰詩云萬疊到孤頂身
齊高鳥翔勢疑撞翼軫翠欲滴瀟湘雲濕幽崖滑風
梳古木香晴空聊縱目杳杳極窮荒又聽琴云拂塵
開素匣有客獨傷時

郡閣雅談記第二
句何事獨顰眉

古調俗不樂

正聲君自知寒泉出澗溢老檜倚風悲縱有來聽者
誰堪繼子期題鄧真人遺址云三千功滿輕升去留
得山前舊隱基但見白雲長掩映不知浮世幾興衰

松梢風觸霓旌動
樓葉霜霑鶴翅垂
近代無人尋異事
野泉噴月寫秋池
與廖融爲詩友
贈之云
伴行惟瘦鶴
尋寺入深雲
終於長沙

李韶郴州人
苦吟固窮
題司空山觀云
梁代真人上紫微
水盤山脚五雲飛
杉松老盡無消息
猶得千年一度歸
識者謂韶必無名果
如其言
王元有詩悼之云
韶也命何霸
生前與世違
貧棲古梵剎
終著舊麻衣
雅句僧抄遍
孤墳客弔稀
故園今孰在
應見夢中歸

陸蟾不知何許人居攸縣司空山聞子規云後夜入清
明遊人何處聽花殘斑竹廟雨歇峴山亭樹罅月欲
落牕間酒正醒衆禽方在夢誰念爾勞形

王操字正美江左人太平興國上南郊賦授太子洗馬
奉使隴右至石濠驛作黃葵詩於壁云昔年南國看
黃葵雲鬢金釵向後垂今日林容籬落下秋風寂寞
兩三枝李相國昉自延安入覲見詩愛之後贈相國
云袖中諫草朝天去頭上宮花侍宴歸贈劉將軍云

三十懸鉤事聖朝功名常受霍嫖姚錦衣香重花垂
足玉帶光寒雪遶腰秣馬暖思秦地草弦弓秋憶鴈
門鵬清時閒却英雄興醉聽笙歌擲酒瓢寒食云馬
搖金勒嘶村墅人搶花毬落野田夜宴云彩牋分卷
碧雲薄蠟燭對燒紅淚乾

同前

卞震蜀人嘗吟即事云雨壁長秋菌風枝落病蟬又云
老筇揜瘦影寒木凭吟身春日偶題云詩債到春無
處避離愁因醉暫時無即事云茶香解睡磨鐺煮山

色牽懷著屐登

並同前

郭功父方與荆公坐有一人展刺云詩人龍太初功父勃然曰相公前敢稱詩人其不識去就如此荆公曰且請來相見既坐功父曰賢道能作詩能爲我賦乎太初曰甚好功父曰只從相公請箇詩題時方有一老兵以沙撿銅器荆公曰可作沙詩太初不頃刻間誦曰茫茫黃出塞漠漠白鋪汀鳥去風平篆潮回日射星功父閣筆太初緣此名聞東南余後於喬希聖

家見太初詩一軸皆不及前所作

直方詩話

東坡作彭門守時過齊州李公擇中秋席上作一絕云
暮雲收盡溢清寒銀漢無聲轉玉盤此生此夜不長
好明日明年何處看其後山谷在黔南令以小秦王
歌之

韓持國酴醾一絕云平生爲愛此香濃仰面常迎落絮
風每到春歸有遺恨典刑尤在酒杯中

詩云春陰垂野草青青時有幽花一樹明晚泊孤舟古

祠下滿川風雨看潮生此蘇子美詩也

雙同集
又同前

賀方回題一絕於定林云破冰泉脉漱籬根壞衲遙疑
掛樹猿蠟屐舊痕尋不見東風先爲我開門舒王見
之大稱賞緣此知名

詩云欲掛衣冠神武門先尋水竹渭南村却將舊斬樓
蘭劍買取黃牛教子孫不知何人作

石曼卿以書名世然愈大愈妙嘗書三佛名最爲雄俊
張文潛有詩云煌煌三佛名榜鐵金石鈕開張宮室

上渾質山岳厚井水駭龍吟蟻封觀驥驟余愛能道
其妙處

詩曰蛟室圍青草龍堆隱白沙護隄盤古木迎棹舞神
鷗破浪南風正收帆畏日斜雲山千萬疊何處上仙
槎此老杜過洞庭詩也李希聲云得之於江心一小
石刻人生燭上花火滅巧妍盡春風饒樹頭日與化
工進只知雨露貪不聞零落近昔我飛骨時慘見當
塗墳青松靄朝霞縹緲山下村既死明月魄無復玻

瓊魂念此一脫灑長嘯登崑崙醉著鸞鳳衣星斗俯
可捫又曰朝披雲夢澤笠釣青茫茫尋綠得雙鯉中
有二元章篆字若丹蛇遶勢如飛翔歸來問天老奧
義不可量金刀割青紫靈文爛煌煌燕服十二環奄
有仙人房暮跨紫鱗去海氣侵肌涼龍子善變化化
作梅花妝贈我疊疊珠靡靡明月光勸我穿絡縷繫
作裾間璫挹予以辭去談笑聞餘香元祐八年東坡
帥定武李方叔王仲弓別於惠濟出示南岳典寶東

華李真人像又出此二詩曰此李真人作也近有人

於江上遇之得此云即李太白也

並同前

楊大年錢文僖晏元獻劉子儀以文章立朝爲詩皆宗
李義山號西崑體後進效之多竊取義山語嘗御賜
百官宴優人有裝爲義山者衣服敗裂告人曰爲諸
館職搏撻至此聞者大噱然大年漢武詩云力通青
海求龍種死諱文成食馬肝待詔先生齒編貝忍令
乞米向長安義山不能過

古今詩話

王正白唐末大播詩名嘗作御溝詩云一派御溝水綠
槐相蔭青此波涵帝澤無處濯塵纓鳥道來雖險龍
池到自平朝宗心本切願向急流傾示貫休休曰刺
一字正白揚袂而去休曰此公思敏書一中字於掌
逡巡正白曰此中涵帝澤休以掌中示之不異所

改青瑣
後集

史青零陵人其先客籍秦隴幼而聰敏博聞強記開元
初年上表自薦臣聞曹子建七步成章臣愚以爲七

步太多若賜召試五步之內可塞明詔明皇試以除
夜上元觀燈竹火籠等詩惟除夜最佳云今歲今宵
盡明年明日催寒隨一夜去春逐五更來氣色空中
改容顏暗裏推風光人不覺已入後園梅

唐宋詩以
爲王湮作

明皇稱賞

僧乾康零陵人齊已在長沙居湘西道林寺乾康往謁
之齊已知其爲人使謂曰我師門似非詩人不游大
德來非詩人耶請爲一絕以代門刺乾康詩曰隔岼

紅塵忙似火當軒青嶂冷如冰烹茶童子休相問報
道門前是衲僧齊已大喜日與款接及別以詩送之
乾康有經方干舊居詩云鏡湖中有月處士後無人
荻笋抽高節鱸魚躍老鱗爲齊已所稱乾德中左補
闕王仲知永州康捧詩見仲覩其老醜曰豈有狀貌
如此能爲詩乎宜試之時積雪方消命爲詩康曰六
出奇花已住開郡城相次見樓臺時人莫把和泥看
一片飛從天上來仲驚曰其旨不淺吾豈可以貌相

人也待以殊禮

賈島詩有影落句韓退之喜之渡桑乾詩曰客舍并州
已十霜歸心日夜憶咸陽如今又渡桑乾水却望并
州是故鄉赴長江道中詩曰策杖馳山驛逢人問梓
州長江那可到行客替生愁

冷齋
夜話

韓子蒼曰丁晉公海外詩云草解忘憂憂底事花名含
笑笑何人世以爲工及讀東坡詩曰花非識面常含
笑鳥不知名時自呼便覺才力相去如天淵

余自并州還江南過都下蔡子因約相見相國寺問余
有詩余曰覺範有寒嵒上元懷京師詩曰上元獨宿
寒嵒寺卧看青燈映薄紗夜久雪猿啼岳頂夢回清
月上梅花十分春瘦緣何事一掬歸心未到家却憶
少年行樂處軟紅香霧噴東華今能作京師上元懷
山中可乎余爲之曰北遊爛熳并州久重到皇州及
上元燈火風光記前事管絃音律試新番期人未至
情如海穿市歸來月滿軒却憶寒巖曾獨宿雪牕殘

夜一聲猿

世徒知文與可掃墨竹不知其高才兼諸家之妙詩尤
精絕戲作鷺鷥六言曰頸細銀鉤淺曲脚高綠玉深
翹岸上水禽無數有誰似汝風標

並同前

苦吟門

李昇受禪之初忽半夜寺僧撞鐘滿城皆驚召將斬之
對云夜來偶得月詩乃曰徐徐東海出漸漸上天衢
此夕一輪滿清光何處無喜釋之

江南野錄

潘閔自號逍遙子作苦吟詩曰髮任莖莖白詩須字字

清

同前

方干爲詩練句字字有功寄人云鶴盤遠勢投孤嶼蟬

曳殘聲過別枝

鑑戒錄

唐人爲詩常積思數十年然後各自名家杜少陵云更

覺良工用心苦豈特我哉

古今詩話

陳舍人從易當時文盛之際獨以醇儒古學見稱詩類
白樂天自稱楊劉唱和西崑集行後進學者爭效之

風雅之變謂之崑體由是唐賢諸集廢而不行陳公
時偶得杜集舊本文多脫誤至送蔡都尉詩云身輕
一鳥其下脫一字陳公與數客各用一字補之或云
疾云落或云下莫能定后得一善本乃是身輕一鳥
過陳公歎服以爲雖一字諸君亦不能到

歐公
詩話

龐穎公喜爲詩雖臨邊典郡文案委前日不廢三兩篇
以此爲適及疾甚余時爲諫官以十餘篇相示手批
其後曰欲令吾弟知老夫疾中尚有此思耳字已摻

淡難識數日薨

寇萊公延僧惠崇於池亭分題爲詩公探得池上柳青
字韻崇探得池鷺明字韻自午至晡崇忽點頭曰得
之矣此篇功在明字凡五壓不倒公曰試口占曰雨
歇方塘溢遲回不復驚曝翎沙日暖引步島風清照
水千尋迥棲煙一點明主人池上鳳見爾憶蓬瀛公
笑曰吾柳之功在青字而四壓不倒不如且已貫休
懷武昌故樓云風清江上寺霜洗月中砧得句先呈

佛無人知此心

賈島初赴舉在京師一日於驢上得句云鳥宿池中樹
僧敲月下門又欲推字煉之未定於驢上吟哦引手
作推敲之勢觀者訝之時韓退之權京兆尹車騎方
出島不覺行至第三節尚爲手勢未已俄爲左右擁
至尹前島具對所得詩句推字與敲字未定神遊象
外不知迴避退之立馬久之謂島曰敲字佳遂並轡
而歸共論詩道留連累日因與島爲布衣之交有贈

島詩曰孟郊死葬北邙山日月風雲頓覺開天恐文章聲斷絕故生賈島在人間自此名著後因不第乃爲僧改號無本居一法乾寺與無可唱和一日宣宗微行至寺聞鐘樓上有吟聲遂登樓於島案上取詩卷覽之島不識乃攘臂睨之遂於手內取詩卷曰郎君何會此耶宣宗下樓而去既而島知之亟謝罪乃賜御札除遂州長江簿後遷普州司倉卒故程錡以詩悼之曰倚恃詩難繼昂藏貌不恭騎驢衝大尹奪

卷忤宣宗馳譽超前輩居官下我儂司倉舊曹事一
見一心忤王元贈詩曰江城賣藥常將鶴古寺看碑

不下驢

唐宋遺史

僧齊已往袁州謁鄭谷獻詩曰高名喧省闥雅頌出吾
唐疊獻供秋望飛雲到夕陽自封修藥院別下着僧
牀幾許中朝事久離鴛鴦行谷覽之云請改一字方
得相見經數日再謁稱已改得詩云別掃着僧牀谷

嘉賞結爲詩友

郡閣雅談

賈島元和中嘗跨驢張蓋橫截天街時秋風正厲黃葉
可掃島吟曰落葉滿長安求一睽不可得不知身之
所從因衝京兆尹劉栖楚即被繫一夕釋之又嘗遇
武宗於定水精舍島尤肆慢武宗訝之他日另與一
日授長江尉至普州司倉卒

永叔言苦吟云一句坐中得片心天外來茲所謂苦

吟破的之句

青瑣集

詩話總龜卷十一

欽定四庫全書

詩話總龜卷十二

宋 阮閱 撰

警句門上

太祖嘗顧近侍曰五代干戈之際猶有詩人今太平日
久豈無之也中官宋永圖於僧寺園亭中得詩百篇
以進有丞相李文正公昉宰相僧閣間望一聯云水
光先見月露氣早知秋

古今
詩話

楊朴字契元鄭州人善爲詩少嘗與畢文簡公士安同學

文簡薦之太宗召見面賦蓂莢詩云狂脫酒家春醉
後亂堆漁舍晚晴時除官不受聽歸山以其子從政
爲長水尉朴爲七夕詩云年年乞與人間巧不道人
間巧已多

魏野陝人字仲先少時未知名題河上寺柱云數聲離
岼櫓幾點別州山時有幕僚本江南文士見之大驚
邀與相見贈詩曰怪得名稱野元來姓不羣仍爲延
譽由是人始重之真宗西祀遣中使召之野閉戶踰

坦而遁

熙寧六年有司言四月初一日日當蝕上為徹樂避正
殿一夕微雨不見日食是日有皇子之慶蔡子正為
樞密獻詩云昨夜薰風入舜韶君王方避正衙朝陽
暉已得前星助陰沴潛隨夜雨銷其叙四月一日避
正殿皇子慶誕陰雲不見日食之盡矣當時無能過
云

成都妓單氏贈陳希夷詩云帝王師不得日月老應難

名士多稱之

唐宋遺史

晏元獻覽李慶富貴曲云軸傳曲譜金書字樹記花名
玉篆牌曰此乃乞兒相未嘗諳富貴者故公每言富
貴不及金玉錦繡惟說其氣象若樓臺側畔楊花過
簾幙中間燕子飛梨花院落溶溶月柳絮池塘淡淡
風是也公自以此句語人曰窮人家有此景否宋宮
公見公佳句皆書於齋壁如無可奈何花落去似曾
相識燕歸來靜尋啄木藏身處閒看遊絲到地時樓

臺冷落收燈夜門巷蕭條掃雪天已定復搖春水色
似紅如白野棠花之類后人不可及

青箱
雜記

蘇爲知吳興日多作詩內一篇最佳云野艇閒撐處湖
天景亦微春波無限綠白鳥自由飛柳色濃垂岸山
光冷照衣時攜一壺酒戀到晚涼歸又在宣城作十
首以宣城爲目內宣城花一篇首出曰宣城花疊嶂
樓前簇綺霞若非翠露陶潛宅即是紅藏小謝家又
在邵武有詩曰愛重八九月登臨高下樓林紅雲白

處寒瀨泊漁舟

丞相王丈惠有宮詞云一聲啼鳥禁門靜滿院落花春日長野步云桑芥科春色漁歌唱夕陽皆佳句也

楚僧惠崇工於詩題楊雲卿郊居云河分崗勢斷春入燒痕青長信詞云陰井生秋早明河徹曉遲江行晚泊云嶺暮清猿急江寒白鳥稀上谷相池上作云歸禽動疎竹落果響寒塘贈陳少府云野人傳相鶴山叟學彈琴夜坐云春淺水生井宵分月上簷贈凝上

人云掩門青檜老出定白髭長送逐客云浪經蛟浦
閭山入鬼門寒經緣公舊寺云遺偈傳諸國留真在
一峰塞上云河冰堅度馬塞雪密藏鵬喜長公至云
久別年顏改相逢夜話長隱者云多年不道姓近日
旋移家宿東林寺云鳥歸山墮雪僧去石沉雲上楊
內翰云露寒金掌重天近玉繩低柳氏書齋云著書
驚日短彈劍惜春深上王太尉云探騎通番壘降兵
逐漢旗田家秋夕云露下牛羊靜河明桑柘空舟行

雲林斷城隍出江分島嶼迴寄梅蘇州云鎖城山月
上吹角海鷗驚宿楊侍郎東亭云卷幔來風遠移牀
得月多送程至云白浪分吳國青山隔楚天宿隱靜
寺云空潭聞鹿飲疎樹見僧行送錢供奉云劒戟明
山雪旌旗濕海雲梅鼎臣河亭云曠野行人少長河
去鳥平宿肇公齋云月高山舍過霜落石門深盧經
西歸云雪多秦木迴雲盡漢山孤濠梁夜泊云夜闌
潮動舸天迴月臨城崔仰秋居云葉影風中靜蟲聲

月下多贈裴使君云行縣山迎舸論兵雪遶旗早行
云繁霜衣上濕殘月馬前低秋夕云磬斷蟲聲出燈
迴鶴影沉書韓退之屋壁云移家臨醜石租地得靈
泉秋夕懷長公云秋近草蟲亂夜遙霜月低觀宴鄉
老云海鷗聽舜樂山老泛堯觴贈素上人云午食下
林鳥夜蟬移塚狐夏夜云扇聲猶泛暑井氣忽生秋
江行早發云殘月楚山曉孤烟江廟春翻經館靖少
卿房云梵容分古像唐語入新經題太保道院云鶴

傳滄海信僧和白雲詩秋夕懷汪白云塞禽樓古柳
破月入微雲贈白上人云花漏沉山月雲衣起海風
喜陳助教至云樓中天姥月座上杜陵人冬日野望
云人歸崗舍近鴈過渚田遙送人知榮州云山色臨
巴迥江流入漢青春深道中云湘雲隨鴈斷楚路背
人遙贈李道士云松風吹髮亂巖溜澌棋寒栖霞寺
云境閒僧度水雲盡鶴盤空林逋河亭云古路隨崗
起秋帆轉浦斜楊秘校池上云禽寒時動竹露重忽

翻河魏仲先山亭云嵐重琴棋濕風長枕簟寒塞上
云離磧鴈衝雪渡河人上冰寄白閣上人云夜梵通
雲竇秋香漏石叢陝西道中云關河雙鬢白風雪一
燈青送防秋楊將軍云殺氣生龍劍威風動虎旗瓜
州亭子云落潮鳴下岸飛雨暗中峰賀劉舍人云日
躔黃道迴春入紫微深除夜云寒燈催臘盡曉角喚
春歸幽并道中云鴈行沉古戍鵬影轉寒沙送僧歸
天台云景霽雲迴合秋風林動搖過陳希夷舊居云

亂水僧頻過荒松鶴不還宿橫江館云露館濤驚枕
空庭月伴琴維邢道中云馬渡冰河闊鷗盤磧日高
報國寺秋居云驚蟬移古柳關雀墮寒庭書早上人
房云松風傳夕磬谿霧擁春燈觀南郊天仗云霓旌
搖曉色鳳吹遶春雲贈義上人云坐石雲生衲添泉
日入瓶昇平詞云萬國無形治三邊不戰平國清寺
云暝鶴棲金刹秋僧過石橋呂氏西齋云雪殘僧掃
石風動鶴歸松劉參幽居云風煖鳥巢木日高人灌

園楊都官池上云竹風驚宿鶴潭月戲春魚書方嶠
壁云圭竇先知曉盆池別見天送陳舍人巡撫云月
露疎寒杵雲濤閃畫旗宿齋上人禪齋云鶴盤金刹
露龍蟄玉瓶泉春日寇宣贊池上云暄風生木末遲
景入泉心七夕云河來天上閣雲度月邊輕贈王道
士云海人來相鶴山秋下聽琴送荊州云畫鷁浮秋
浪金饒響夕雲江城晚望云丹楓映郭迥綠嶼背江
深題王太保山亭云危溜含清瑟飛花點玉觴送李

秦州云朱旗臨雪卷畫角入雲吹畫上人西齋云孤
雲還靜境遠籟發秋聲李太傅山庄云圓碁分雪石
汲井動金沙宮中詞云井含春氣碧樓轉夕陰清送
吳袁州云鳥暝風沉日天清月上旗寄肇公云斜吹
鳴金錫歸雲擁石牀塞上云古戍生煙直平沙落日
遲贈嗣上人云拂石雲離帚烹茶月入鐙舟行云遠
嶼迎檣出疎林帶岼回送來上人云來時雲擁衲別
後月隨筇馬蟪淮亭云路橫岡燒斷風轉浦帆斜贈

戴殿前云劍靜龍歸匣旗開虎遶竿高誼書齋云品
畫逢名客橫琴憶古賢太乙山云雲陰移漢塞石色
入晴天塞上送人云地遙羣馬小天闊一鷗平范溶園
池云江花凌霰發山溜入池深獵騎云長風躍馬路
小雪射鵬天高略書院云古木風烟盡寒潭星斗深
送段工部河北漕云渡河風動旆巡部雨霑車題高
生山閣云對酒淮潮起題詩楚月新經明大師房云
門掩前朝樹心垂別郡峰送李堪云秋聲動羣木暮

色起秋山

並同前

歐陽文忠公守滁見王元之謝上表云諸縣豐登絕少

公事全家飽煖共荷君恩因成詩云諸縣豐登少公

事全家飽煖荷君恩

撫遺

楊軒字公遠衡州人嘗有燈詩曰解照日月不照處獨

明天地未明時

同前

李煜作詩大率多悲感愁戚如青鳥不傳雲外信丁香
空結雨中愁鬢從今日添新白菊是去年依舊黃之

類然思清句雅可愛

翰府名談

陳亞大卿士大夫徒傳其諧謔之語不知其作詩甚佳如浪平天影接山盡樹根回得作者之格

趙師民龍圖有春日即事詩云委地露花啼曉淚拂堤煙柳弄春容又如麥天晨氣潤槐夏午陰清曉鶯林外千聲囀芳草堦前一尺長皆佳句

並同前

太常博士黃孝先字子思爲咏懷詩曰日者未知裴令貴時人爭笑禰生狂又作重五詩曰風簷燕引五六

子露井榴開三四花

春明退朝錄

孟賓于子名歸唐寓廬山學得瀑布一聯云練色有窮處寒聲無盡時隣房有人亦得此聯互誦其句助教不能理因送江州以全篇定之而歸唐勝焉大爲時賢所知

夏寶松廬陵人與劉洞唱和爲節度使陳德誠所知德誠贈詩曰建水舊傳劉夜坐

劉洞有螺川新有夏江夜坐詩

城寶松有江城詩曰鴈飛南浦鐘初動月滿西樓酒

半醒又云曉來羸馬依前去雨後遙山數點青皆佳

句

江南野錄又雅言系述別有寶松宿臨江驛全篇并劉洞宿寶松山齋詩以寶松爲保松

唐仁傑全州人苦吟陳德誠出守池陽仁傑以詩貽之

云紅旆渡江霞蘸水青蛇出匣雪侵衣德誠善之勉

之入金陵會休沐朝達集于升元寺召之坐酒行請

仁傑賦登閣詩立談而成其中有句云雲散便宜千

里望日長斜占半城陰其餘亦可觀贈嘉禾峰僧云

只住此山能有意向來求佛本無心時論與之

並鑑戒野

錄

施肩吾好作諸詩著山居百韻如荷翻紫蓋搖波面蒲
瑩青刀挿水湄煙粘薜荔龍鱗軟雨壓芭蕉鳳尾垂
錢鄧師嘗舉思賈誼兩句云可憐半夜虛前席不問蒼

生問鬼神后人何可及

談苑

潘道遙貧居詩曰長喜詩無病不憂家更貧峽中聞猿
曰何須三叫絕已恨一聲多哭高舍人詩曰生前是
客曾投卷死後何人與撰碑張乖崖贈道遙詩云莫

嗟黑鬢從頭白終見黃河到底清宋白尚書贈云宋

朝歸聖主潘浪是詩人

退朝錄

蜀僧希書游鴈碣山云天長來月正木末度猿稀答黃
桂州云束書逢歲嗣去夢歷峰危送廣漕云春生桂
嶺外人在海門西送僧東歸云帆影先寒鴈經聲隱
暮潮宋承旨林亭云雪溜垂危石碁燈射遠林贈僧
云漱齒冰溪遠聞蟬雪屋深送人云玉繩天闕近金
柝海城秋贈勾學士云曉天金馬路晚歲石霜心寄

人云山日秋光短江虹晚影低送新津尉云劍月啼
猿苦江沙濯錦寒北宮書亭云花露盈蟲穴梁塵墮
燕泥贈關上人云寄禪關樹老乞食塞城羗送僧歸
新安云風泉舊聽僧窗改雲穴曾行鳥徑殘春山云
芳樹侵雲老孤泉落石危送人歸南海云落日橫秋
島寒濤兀夜船浙僧寶通題相國寺云下朝人帶天
香出入定僧迎御杖頭僧守恭佛迹峰云市髮人來
絕銜花鹿去多僧行輦送僧云定錫樵停斧窺人鳥

立槎送人之鄞江云江聲鰲背出帆影斗邊飛僧簡
長送人歸寧州云煙壘沉寒角霜空擊怒鵬尚能送
僧歸浙右云霜洲楓落盡水館月生寒送僧歸四明
云古寺山光後重城海氣圍送人云西風隨鴈急寒
柳向人踈送孫大諫知永興云關河虎符重殿閣獸
樽閒僧知人溪居云寒聲病葉落曉色凍雲開送僧
歸天台云路遙無去伴山疊有啼猿冬夕云風窗燈
易滅雪屋夜偏寒僧休復送道士西遊云日暮長安

道秋深太白峰僧惟鳳秋日送人云去路正黃葉別

君堪白頭哭度禪師云海客傳遺偈林僧寫病容

談苑

楊文公言自雍熙初歸朝迄今三十年所閱士大夫多

矣能詩者甚鮮如侍讀兵部宿擅其名而徐鉉梁周

翰范宗黃夷簡皆前輩鄭文寶薛映王禹偁吳俶劉

師道李宗諤李建中李維姚鉉陳堯佐悉當時儕流

後來著聲者如路振錢熙丁謂錢易梅詢李拱蘇爲

朱巖陳越王魯李堪陳詒呂夷簡宋綬邵煥晏殊江

任焦宗古布衣有林逋周啓明錢氏諸子有封守惟
濟供奉錢昭度即曲有今南鄭殿丞楊黎州家居及
高官薄覺宗人字牧之並有佳句可以摘舉而錢惟
演劉筠特工於詩

楊徽之侍讀春望云杳杳煙蕪何處盡搖搖風柳不勝
垂寒食云天寒酒薄難成醉地迴臺高易斷魂塞上
云戍樓煙自直戰地雨長腥僧舍云偶題巖石雲生
筆間遶庭松露濕衣湘中舟行云新霜染楓葉皓月

借蘆花哭江爲云廢宅寒塘水荒墳宿草煙嘉璟川
云青帝已教春不老素娥何惜月重圓又云浮花水
入瞿塘峽帶雨雲歸越雋州元夜云雲歸萬年樹月
滿九重城宿東林云開盡菊花秋色老落遲桐葉雨
聲寒

徐鉉遊木蘭亭云蘭橈破浪城陰直玉勒穿花苑樹深
觀習水戰云千帆日助陰山勢萬里風馳下瀨聲病
中云向空咄咄頻書字忘世滔滔莫問津謫居云野

日蒼茫悲鵬舍水風陰濕弊貂裘陳秘監歸泉州云
三朝恩澤馮唐老萬里江山賀監歸宿山寺云落月
依樓閣歸雲擁殿廊

梁周翰應制云百花將盡牡丹拆十雨初晴太液春黃
夷簡題人山居云宿雨一番蔬甲拆春山幾焙茗旗
香

鄭文寶郊居云百草千花路斜風細雨天重經貶所云
過關已躍樗蒲馬悞喘尤驚顧兔屏洛城云星沉會

節歌鐘早天半上陽煙樹微贈張靈州云越絕曉殘
蝴蝶夢單于秋引畫龍聲長安送別云杜曲花光濃
似酒灞陵春色老於人送人歸湘中云滿帆西日催
行客一夜東風落楚梅南行云失意慣中遷客酒多
年不見侍臣花棲靈隱寺云舊井霜飄仙界橘雙溪
時落海邊鷗送人知韶州云碧落春風老朱陵古渡
頭永熙陵云承露氣清駒送日觚稜人靜烏呼風邊
上云鬢間相似雪峰外寂寥煙

薛映送人知鄂州云黃鶴晨霞傍樓起陀頭秋草遶碑
荒

吳俶送朱致政云洛殿夜涼初閣筆渚宮歲晚得懸車
劉師道寄別云南浦未傷春草碧北山仍愧曉猿驚與
張必云久師金馬客勅敵玉溪生荷花云有路期奔
月無媒與嫁春殘花云金谷路塵埋國艷武陵溪水
泛天香寄陳龍圖云晨瞻北斗天何遠夢斷南柯日
未沉歎世云野馬飛窗日醯雞舞甕天春雪云青帝

翠華沉物外素娥孀影弔雲端咏雪云三千世界銀
成色十二樓臺玉作層湘中云逝波帝子魂何在夢
草王孫怨未歸

李宗諤春郊云一溪曉綠浮鷗鷺萬樹春紅叫杜鵑贈
蘇承旨云金鑾後記人爭寫玉署新牌帝自書

李建中送人云山程授館聞鴻夜水國還家欲雪天

李維渚宮亭云故宮芳草在往事暮江流朱致政云清
朝納祿猶狂健白首還家正太平和人贈馬太保云

轉盼迴嵩電分髯磔蝟毛寄洪湛云謫去賈生身健
否秋來潘岳鬢斑無

姚鉉錢塘郡云踈鐘天竺曉一鴈海門秋

陳堯佐潮州召還云君恩來萬里客路出千山送种放
云供帳開天苑傳呼度國門送人越州云風樵若耶
路霜橘洞庭秋送朱荊南云部吏百函通爵里從兵
千騎屬韃橈

錢熙送人金陵拜掃有云鶴歸已改新城郭牛卧重尋

舊墓田

丁謂和錢易曰珊瑚新筆架雲母舊屏風送章安南云
梅花過嶺路桃葉渡江船送章明州云泣珠泉客通
關市種玉仙翁寄版圖送陳荆南云楚子夢雲鈴閣
密郢人歌雪射堂開

錢易畫景云雙峰上簾額獨鵲裊庭柯芭蕉云綠章封
事緘初啓青鳳求凰尾乍開

梅詢陰陵云千里漢園合一夜楚歌聲

李拱春題村舍云犬眠花影地牛牧雨聲坡

蘇爲送劉端州云夜浪珠還浦春泥象印蹤

朱巖贈徐常侍云寓直有誰同騎省立班獨自戴貂冠
陳越侍宴云千鍾人既醉九奏鳳來儀與劉慘云莫哀
城下酌不廢洛中吟送李秦州云擁路東方騎懸腰
左顧龜

王魯送李駙馬拜陵云人畏軒臺久春歸雨澤多

李堪哭韓黎州云桐鄉留語葬銘路在生悲送周建州

云海月隨帆落溪花遶驛流送人行云雷風有約青
蚪起霜露無情紫蕙枯退居云雨密絲桐潤潮平釣
石沉

陳詒閒居云籠雞對窗語羅雀繞門飛

呂夷簡早春云梅無驛使飄零盡草怨王孫取次生九
日呈梅集仙人云人歸北闕知何日菊映東籬似去
年寒食云人爲子推初禁火花愁青女再飛霜

宋綬送人知江陵云奇才劍客當前隊麗賦騷人託後

車送人知洪州云江涵帝子翬飛閣山際真君鶴馭
天送周賢良云楚澤傷春怨鷓鴣長安索米愧侏儒
趙復送晏集賢南歸云船官風破浪闕吏鼓通晨

晏元獻與張臨川云籬邊菊秀先生醉桑下雛嬌稚子
仁又云東陽詩骨瘦南浦別魂銷送章明州云騷客
登山知有助秦源雞犬更相聞送人知洪州云干斗

氣沉龍已化置芻人去榻猶懸

並同前

江任送人云珠盤臨路設斗印入鄉提

玉堂詩話

焦宗古送人遊蜀云芳樹高低啼蜀魄朝雲濃淡極巴
天贈周賢良云南陽客自稱龍卧東魯人應歎鳳哀
林逋湖山云片月通蘿徑幽雲在石牀

周啓明近臣疾愈云一丸童子藥五返使人車送皇甫
提刑云鷓鴣夷江上畬田稔牛斗星邊貫索空

錢惟濟太一宮醮云墀下焚香連宿霧林間鳴珮起棲
鸞從駕西巡云曉陌壺漿滿春風騎吹長故主第云
鳳簫通碧漢星斗辯靈源

錢昭度村居云黃蜂衙退海潮上白蟻戰酣山雨來大
寒云雨被北風吹作雪水愁東海亦成冰金陵云西
北高樓在東南王氣銷梅花云東北風吹大庾嶺西
南日映小寒天鴈云三年別館風吹入萬里長沙月
照來秋遊華山云人間路到三峰盡天下秋隨一葉
來

南鄭殿丞云青鳥幾傳王母信白鵞曾換右軍書將至
京云近闕已瞻龍虎氣思鄉猶望斗牛星

楊黎州赦至云山川百蠻國雨露九天書寄遠云胡越
自爲迢遞國參商元是別離星自遣云天上羲輪都
易識人間堯厯自難逢哭儲屯田云部中車雨春無
潤天上星郎夜損光感悟云頓纓狂走鹿吐沫倦遊
鱗心知云遠別苦驚雲聚散相逢多悟月盈虧自咏
云剛腸欺竹葉哀鬢怯蘆花淚云一斑早寄湘川竹
萬點空遺峴首碑竹簟云若非虎珀休爲枕不是琉
璃莫作屏春晝云人歸漢后黃金屋燕在盧家白玉

堂

並同
前

牧之寄人云世味嫌爲枳時光怨落莫閒居云歌懷飯
牛起書憤抱麟成蟬云二子自不食三閭何獨清登
樓云遠水淨林色微雲生夕陽塵云已傷花榻滿休
妬畫屏飛


談苑

西洛古都荒臺廢沼遺迹依然見於詩多矣惟錢文僖
公一聯最爲警策云日上故陵煙漠漠春歸空苑水
潺潺裴晉公綠野堂在午橋南往時屬張相齊賢家

罷相歸終日與客宴其間惟鄭文寶工部一聯爲警
絕云水暖鳬鷺行哺子溪深桃李卧開花人謂不減
王維杜甫錢詩好句尤多而鄭句不惟當時人莫及

雖其集中若及此者亦少

歐公詩話



詩話總龜卷十二